



Jumat, 22 Oktober 2021

Ogen: Masmur 12:4-5



Simehuli Belasken



Lit nina belas belas `tergelincirnya kaki lebih selamat daripada tergelincirnya lidah'. Luar biasa kepe ulih tergelincir lidah enda. Emaka perlu kal i bas ngerana, ukurilah mbages maka belasken. Desken kata nini-nininta nai, sisisik lebe maka tindes. Sabab dikune enggo ibelasken mesera kal muatca, kata e enggo sikerajangen kalak sideban janah enggo atena ngangkaisa. Amin ijelasken pe bagenda nge maksudku ndai ninta langa tentu teraloken kalak sideban.

Renungenta enda bagin kata siibelasken Pemasmur sijadi isi pertotonna. Ia iperhadapkan kubas cakap sinterem situhu-tuhu la saja ngelukai pusuhna tapi pe nguraki semangatna. Lanai lit kalak mehuli, nina. La ibalasma kata-kata e tapi iturikenna man Tuhan. Emaka nina `pesiniklah dilah kalak percakap longgar, sompel babah kalak si ngerana megombang'. Luar biasa kata siibelasken Pemasmur man Dibata, sabab manusia labo ergegeh ngelakoken sienda, Dibata ngenca ngasup ras pantas ngelakokenca. Sabab Ia kap Dibata si erkuasa.

La saja ibas percakapen sitep-tep wari arus sijaga kata si belasken kita gelah la sempat `tergelincir ntah pe silap lidah'. Mbelin kal ulih cedana, la saja simegi-megi ntah pe tujuan belas-belasta tapi pe kita simelaskenca banci ka nge lanai tenang. Bage me ibas SKMS enda, sienggo sibuat baginta ibas ertoto, notoken proses perdalanan sidang e bagepe kerina pesertana. Kita pe notoken, gelah kerina singerana, cakap sibelasken cakap simehuli, cakap si jadi pasu-pasu. Mpeturah semangat pelayanen ibas wari-wari sireh. Bahasa `kristianilah' sindarat ibas bibir tep-tep kalak singerana. Daud pe nuriken contoh kalak simegombang ibas ngerana, iakapna arah rananna banci datna kai atena, sirangilah si la uli e.